

立齋外科心法序



神農氏嘗百草黃帝氏作  
實開萬世醫學之源是後  
代作無慮百人然推本二  
聖人遺旨發其未發以啓  
來學則吾得二人焉蓋李  
明之嘗受學於王從之馮  
叔獻兩君子朱彥修



又受學於大儒許謙故皆以其  
濟世之學托之乎醫而醫幾乎  
聖予多病欲知醫嘗閱本草素  
問及東垣丹溪書心甚契之每  
以語醫家者流則皆茫然予喟  
曰不知此豈醫也乎嘉靖甲申  
始識姑蘇立齋薛君新甫於南

都耳其論殊洽內經二子予竒  
之索其所著書得外科治驗若  
千卷閱之大較以損實益虛標  
本陰陽爲變通之法故隨試輒  
效如良將用兵徃無不克予心  
賞之爲題曰立齋外科心法蓋  
君夙潛心於內經見其要指而

研究李朱尤盡其妙故所詣如  
此君之父良武以儒生邃醫徵  
入太醫院忤歸齋志以歿君踵  
入院益自奮精其術名冠一時  
遂擢御醫

簡判南京太醫院慎職不苟獲重  
語縉紳間可謂能繼其父志且  
顯揚之矣予以是益嘉之決其  
書可傳也爲之序

大明嘉靖四年乙酉春三月朔  
賜進士出身南京禮部郎中金谿  
東石王奠時禎書

立齋外科心法目錄

卷之一

瘡瘍用藥總論

膿潰論

生肌止痛

惡肉論

瘡瘍捨時從證

瘡瘍有餘

潰瘍有餘

腫瘍不足

潰後發寒熱

潰瘍作痛

潰瘍不痛

熱毒作嘔

胃寒作嘔

卷之二

瘡瘍作渴

瘡瘍便秘

膿熟開遲

腐肉去遲

陰證似陽

陽證似陰

用藥生肌

罨毒入肉

喉閉

口齒

瘰癧

附骨鯁穀麥芒入  
喉誤吞金銀銅錢

流注

乳癰

漏瘡

附骨疽

腸癰

卷之三

肺疽

疔瘡

脫疽

天泡瘡

楊梅瘡

時毒

風熱

婦人血風癩疹

風寒

鶴膝風 即鼓椎風

濕熱

痔 附疝氣 囊癰  
婦人陰瘡 男子便血

懸癰

便毒

卷之四

疔瘡

附玉莖腫及挺縮  
出白精

杖瘡

火瘡

虫犬傷 附破傷風

腹痛

誤吞水蛭

蟲入耳

小兒

丹瘤 疔瘡

瘡毒 瘡疽

瘡疥 痘毒

結核 腦疳

黃水瘡 疥瘡

粘瘡 疔瘡

癩疹 無辜疔毒

槐花酒治驗

金銀花治驗

鍼法總論

灸法總論

騎竹馬灸法圖

八味丸治驗

危證

目錄終

立齋外科心法卷之一

南京太醫院院判長洲薛巳新甫著

瘡瘍用藥總論

夫人之病不同藥之性亦異有是病而宜用是藥不可以誤施也且如瘡疽痛息自寧飲食知味脉證俱緩緩則治本故可以王道平和之藥徐而治之亦無不愈若脉沉焮腫寒熱煩躁此脉症俱實宜瀉之非硝黃猛烈之劑不能除投以王道之劑則非也若瘡瘍聚腫不潰潰而膿水清稀或瀉利腸鳴飲食不入嘔吐無時或手足並冷此脉證俱虛非大補之藥不

能平投以硝黃攻伐之劑亦非也當推內經本旨而  
虛者補之實者瀉之熱者清之寒者溫之隨證用藥  
臨機應變庶不誤耳大抵瘡瘍之證皆由臟腑不和  
氣血凝滯喜怒不常飲食不節或腠理不密邪氣客  
於經絡或服丹石之藥及膏梁厚味不慎房室精虛  
氣竭所致故治其證者當辨其表裏虛實隨宜治之  
若不推陰陽逆順氣味攻守率爾投藥以致實實虛  
虛或槩以王道爲萬全猶執一而無權適以害之矣  
謹錄所嘗試而驗者于后以告同志

### 膿潰論

夫癰疽瘡癤皆由氣血壅滯而生也當推其虛實表  
裏而早治之可以內消此卽托裏之意也若毒氣已  
結者勿泥此內消之法當辨膿之有無淺深若按之  
卽復起者有膿也不復起者無膿也大按方痛者膿  
深也小按便痛者膿淺也急酌量刺之緩則穿通臟  
腑腐爛筋骨可不慎哉但病者多喜內消而醫者卽  
用十宣散及敗毒散流氣飲之類殊不知十宣散雖  
有參耆然防風白芷厚朴桔梗皆足以耗氣况不分  
經絡時令氣血多少而槩用之乎敗毒散乃表散之  
藥也雖有表證不過一二服况非表證而用之乎流

氣飲乃行氣散血之劑若服之過度則氣虛血耗何以爲膿此三藥者不可輕用明矣若夫瘡旣成膿皮膚不得疏泄昧者待其自穿殊不知少壯而克實者或能自解若老弱之人氣血枯槁無或攻發太過不行針刺膿毒乘虛內攻穿腸腐膜鮮不誤事如沈氏室乳癰膿成予爲針刺及時不月而愈黃上舍腿癰膿熟惡針幾至危殆予爲刺之大補三月而愈練干兵腿癰脉證俱弱亦危甚矣予治以托裏得膿急使針刺彼固不從致膿水開泄淋漓不能收斂而死王安人發背待其自破毒氣內攻王貴腹癰潰透腹脇穢從瘡口而出予謂其決不起果然大抵瘡瘍之證感有輕重發有淺深淺者腫高而軟發於血脉深者腫下而堅發於筋骨然又有發於骨髓者則皮肉不變膿成之時氣血壯實者或自出怯弱者不行針刺鮮有不誤東垣云毒氣無從而解膿瘀無從而泄過時不烙反攻於內內旣消敗欲望其生豈可得乎茲舉一二與同道裁之使患者知所慎云

### 生肌止痛

夫肌肉脾之所主也潰後收斂遲速者乃氣血盛衰使然世之治者但知生肌用龍竭之屬止痛用乳沒



之屬恪守不移余謂不然蓋生肌之法當先理脾胃助氣血爲主則肌肉自生豈假龍竭之屬設若膿毒未盡就用生肌反增潰爛壯者輕者不過復潰或遲歛而已怯者重者必致內攻或潰爛而不斂亦危矣蓋止痛之法熱者清之寒者溫之實者損之虛者補之膿鬱者開之惡肉侵蝕者去之如是則痛自止豈假乳沒之屬如黃汝耘背發毒氣未盡早用生肌竟致潰爛予以解毒藥治之得愈許序班患此毒氣始發驟用生肌其毒內攻而死王汝道患腿癰因寒作痛與乳香定痛丸周朝儀母患時毒因熱作痛與防風通聖散丁蘭患臀癰膿潰因虛作痛與益氣養榮湯劉貴患腹癰因實作痛與黃連內踈湯王州守患腿癰膿成作痛予以爲刺之楊千兵母發背腐肉侵蝕作痛予以爲取之痛各自止嗟夫以寒治熱以熱治寒損實補虛此用藥者之繩墨若專用龍竭生肌乳沒止痛予以恐其功不奏也

### 惡肉論

夫惡肉者腐肉也大凡癰疽瘡腫潰後腐肉疑滯必取之乃推陳致新之意若壯者筋骨強盛氣血充溢真能勝邪或自去或自平不能爲害若年高怯弱之

人血液少肌肉澁必先迎而奪之順而取之是謂定禍亂以致太平設或留而不去則有爛筋腐肉之患如劉大尹汪太夫人取之及時而新肉即生得以全愈金工部陸舍人取之稍遲幾至不救鄭揮使取之失期大潰而斃予嘗見腐肉既去雖少壯者不補其氣血亦不能收斂若怯弱者不取惡肉不補氣血未見其生也患者慎之

瘡瘍捨時從證

張通北方人年踰四十夏月腋下患毒潰後不斂膿出清稀皮寒脉弱腸鳴切痛大便溏泄食下則嘔此

寒變而內陷也治法宜以大辛溫之劑遂投以托裏溫中湯二貼諸證悉退更以六君子湯加泡乾薑肉桂數劑再以十全大補湯而愈陳揮使年踰五十冬月腿患癰脉數煩躁引冷便秘腫痛熾甚此熱滯於內也法當以苦寒之藥投以清涼飲倍加黃芩治之其勢頓退更以四物湯加黃芩而痊又胡生耳後患毒脉證俱實以內疎黃連湯治之彼以嚴冬不服寒劑竟至不起殊不知羅謙甫曰用寒遠寒用熱遠熱有假者反之雖違其時以從其證又云凡治病必察其下謂察時下之宜而權治之故曰經者常也法者

用也醫者意也隨其所宜而治之可取萬全之功矣

瘡瘍有餘

維揚俞黃門年踰三十冬月鬢患毒腫焮煩躁便秘  
脉實此膽經風熱壅上而然也馬氏云瘡瘍之證熱  
實而不利者大黃湯下之遂以一劑便通瘡退更以  
荆防敗毒散二劑再以十宣散去桂加天花粉金銀  
花數劑而愈太宗伯羅公耳後髮際患此焮痛脉數  
以小柴胡湯加桔梗牛蒡子金銀花四劑而愈

趙州守北方人年踰四十頭面生瘍瘡數枚焮痛飲  
冷積日不潰服清熱消毒藥不應診其脉數按之則  
實予以防風通聖散二劑頓退又以荆防敗毒散而  
愈又一男子患在四肢審其脉證亦屬有餘以黃連  
解毒湯治之亦愈

楊百戶曾患毒腫高焮赤發熱脉數大小便澀飲食  
如常齊氏曰腫起色赤寒熱疼痛皮膚壯熱頭目昏  
重氣血之實也又云大便硬小便澀飲食如故腸滿  
膨脹胸膈痞悶肢節疼痛身熱脉大精神昏塞臟腑  
之實也遂以黃連內疎湯二劑諸證漸退更以荆防  
敗毒散加苓連山梔四劑少愈再以四物湯加苓連  
白芷桔梗甘草金銀花數劑而消

張錦衣年踰四十患發背心脉洪數勢危劇經云心脉洪數乃心火熾甚諸痛痒瘡瘍皆屬心火心主血心氣滯則血不行故生癰也騎竹馬灸穴是心脉所由之地急灸之以瀉心火隔蒜灸以拔其毒再以托裏消毒果愈

潰瘍有餘

一男子年踰三十腹患癰腫脉數喜冷齊氏云瘡瘍腫起堅硬瘡疽之實也河間云腫硬木悶煩燥飲冷邪氣在內也遂用清涼飲倍用大黃三劑稍緩次以四物湯加芩連山梔木通四劑而遂潰更以十宣散

去參芪肉桂加金銀花天花粉漸愈彼欲速効自服溫補藥遂致肚腹俱腫小便不利仍以清涼飲治之膿潰數碗再以托裏藥治之而愈東垣云瘡疽之發其受之有內外之別治之有寒溫之異受之外者法當托裏以溫劑反用寒藥則是皮毛始受之邪引入骨髓受之內者法當踈利以寒劑反用溫劑托裏則是骨髓之病上徹皮毛表裏通潰共爲一瘡助邪爲毒苦楚百倍輕則幾殆重則死矣

張都憲夫人性剛多怒胸前作痛肉色不變脉數惡寒經云洪數之脉應發熱而反惡寒瘡疽之謂也今

脉洪數則膿已成但體豐厚故色不變似乎無膿以痛極始肯用針入數寸膿出數碗遂以清肝消毒藥治之而愈設泥其色而不用針無可救之理矣

趙宜人年踰七十患鬢疽已潰焮腫痛甚喜冷脉實大便秘澀東垣云煩躁飲冷身熱脉大精神昏悶者皆臟腑之實也遂以清涼飲一劑腫痛悉退更以托裏消毒藥三十餘劑而平若謂年高潰後投以補劑實實之禍不免矣

腫瘍不足

汪太常太夫人年踰八十腦疽已潰發背繼生頭如

粟許脉大無力此膀胱經濕熱所致夫脉無力乃血氣衰也遂以托裏消毒藥數服稍可更加參芪之劑雖起而作渴此氣血虛甚以人參黃耆各一兩當歸熟地各五錢麥門冬五味子各一錢數服渴止而不潰以前藥加肉桂十餘劑膿成針之瘀肉漸腐徐徐取去而膿猶清不斂投以大劑十全大補湯加白欬貝母遠志三十餘劑膿稠而愈設若不加峻補及不去腐肉以渴爲火投以涼藥欲保其生也難矣

居庸關王揮使臂腫一塊不痛不赤惟脉弱懶食時嘔以六君子湯加藿香酒炒芍藥治之嘔止食進再

以八珍湯二十餘劑成膿刺之又以十全大補而愈  
次年傷寒後此臂仍腫微痛乃傷寒餘毒也然無表  
證但虛弱先用十宣散四劑取參耆芎歸扶助元氣  
防風桔梗白芷厚朴行散腫結肉桂引經破血腫退  
三四再以八珍湯膿潰而愈至冬臂復作痛因服祛  
風藥反筋攣痛甚予謂此血虛不能養筋筋虛不能  
束骨遂以加味十全大補湯百貼而愈

崑山高舉人年踰三十夏月熱病後患頤毒積日不  
潰氣息淹淹脉診如無飲食少思大便不禁脉經云  
脉息如無似有細而微者陽氣衰也齊氏云飲食不

入大便滑利腸胃虛也遂以六君子湯加炮乾薑肉  
豆蔻破故紙數劑瀉稍止食稍進更加以黃耆當歸  
肉桂潰而膿水清稀就於前藥每服加熟附子一錢  
數劑瀉止食進膿亦漸稠再以十全大補湯用酒炒  
芍藥加白歛月餘而愈

句容曹水部文兆年踰四十髀髀患毒已半月餘頭  
甚多狀如粟許內痛如刺飲食不思怯甚脉歇至此  
元氣虛疽蓄于內也非灸不可遂灸二十餘壯飲以  
六君子湯加藿香當歸數劑瘡勢漸起內痛頓去胃  
脉漸至但瘡色尚紫瘀肉不潰此陽氣尚虛也燃葉

柴炙之以補接陽氣解散其毒仍以前藥加參耆歸  
桂色赤膿稠瘀肉漸腐取去兩月餘而愈夫邪氣沉  
伏真氣怯弱不能發起須灸灸而兼大補投以常藥  
待其自潰鮮有不悞者

一男子因勞發熱脇下腫痛脉雖大而按之無力此  
氣血虛腠理不密邪氣襲于肉裏而然也河間云若  
人飲食踈精神衰氣血弱肌肉消薄榮衛之氣短促  
而澁滯故寒薄腠理閉鬱而壅腫也當補之以接虛  
怯之氣遂以補中益氣湯加羌活四劑少可去羌活  
又十餘劑而愈又一男子年二十遍身微痛腰間作

腫痛甚以前藥加茯苓半夏並愈

朱文鼎母因忿鬱腋下一核二十餘年因怒加腫  
痛完穀不化飲食少思東垣云瀉利不止飲食不入  
此腸胃虛也遂以六君子湯加砂仁肉桂乾薑肉豆  
蔻瀉雖止而膿清瘡口不合氣血俱虛也以十全大  
補湯月餘而愈

一男子素好酒色小腹患毒脉弱微痛欲求內消予  
謂當助胃壯氣兼行經活血藥佐之可消不宜用敗  
毒等藥彼欲速効自用之病勢果盛瘡亦不潰飲食  
少思迨兩月餘復請予治診其脉愈弱盜汗不止聚

腫不潰肌寒肉冷自汗色脫此氣血俱虛也故不能發腫成膿以十全大補湯三十餘劑遂成膿刺之反加煩燥脉大此亡陽也以聖愈湯二劑仍以前湯百貼而愈

一男子脇腫一塊日久不潰按之微痛脉微而瀼此形證俱虛也經曰形氣不足病氣不足當補不當瀉予以人參養榮湯治之彼不信乃服沅氣飲虛證悉至方服前湯月餘少愈但腫尚硬以艾葉炒熱熨患處至十餘日膿成以火針刺之更灸以豆豉餅又服十全大補湯百劑而愈蓋流氣飲通行十二經則諸

經皆爲所損况膽經之血原少又從而損之幾何不  
至於禍耶凡一經受病則當主於其經苟不察其由  
泛投剋伐之劑則諸經被戕能無危乎河間云凡瘡  
止於一經或兼二經者止當求責其經不可干擾餘  
經也

張通府耳後髮際患腫一塊無頭肉色不變按之微痛彼以爲痰結診其脉軟而時見數經云脉數不時見則生瘡也非痰結仲景云微弱之脉主血氣俱虛形精不足又云沉遲軟弱皆宜托裏遂以人參白朮黃耆當歸川芎炙甘草以托裏少加金銀花白芷桔



梗以消毒彼謂不然內飲降火化痰外貼涼藥覺寒  
徹腦患處大熱頭愈重飲食愈少復請治以四君子  
湯加藿香炮乾薑數劑飲食漸進膿成刺之更以十  
全大補湯去桂及灸以豆豉餅又月餘而愈

山西曹主簿年踰四十夏間患附骨癰予以火針刺  
去瘀血更服托裏藥而愈至秋忽不飲食痰氣壅盛  
勞則口舌生瘡服寒藥腹痛彼疑爲瘡毒診之脾腎  
脉輕診似大按之無力此真氣不足虛火炎上故也  
遂投以八味丸治之彼謂不然自服二陳四物幾殆  
復請予仍以前丸治之而愈有脾土虛不能剋制腎

水多吐痰而不咳者尤當用此丸也

平氏室患發背以托裏消毒藥二十餘劑而潰因怒  
頓吐血五六碗許氣弱脉細此氣血虛極也遂令服  
獨參膏斤許稍緩更以參耆歸朮陳皮炙甘草三十  
餘劑瘡口漸合設投以犀角地黃湯沉寒之藥鮮有  
不誤

一男子年踰四十胃氣素弱面常生瘡盜汗發熱用  
黃耆建中湯少愈更以補中益氣湯而平東垣云氣  
虛則腠理不密邪氣從之逆於肉理故多生瘡若以  
甘溫之劑實其根本則腠理自固即無他疾

外科心法卷一  
十一  
一男子神勞多怒頸腫一塊久而不消諸藥不應予  
以八珍湯加柴胡香附每日更隔蒜灸數壯及日飲  
遠志酒二三盞而漸消

宜興徐符卿年踰四十患發背五日不起肉色不變  
脉弱少食大便不實予以凡疽未潰脉先弱難於收  
斂用托裏消毒散二劑方起發彼惑一嫗言貼膏藥  
服攻毒劑反盛背如負石復請予治遂以隔蒜灸三  
十餘壯彼云負石已去但痒痛未知更以托裏藥知  
痛痒膿清仍以前藥倍加參芪佐以薑桂膿稍稠又  
爲人惑外用猪腰子貼抽膿血內服硝黃劑遂流血

五六碗許連瀉十餘行腹內如冰飲食不進不得已  
速予診之脉盡脫已不可醫矣蓋其證屬大虛不足  
之甚雖一於溫補猶恐不救况用攻伐之劑不死何  
俟

沈侍御文燦患臀腫痛小便不利彼謂關格症以艾  
蒸臍大便亦不利以降火分利之藥治之不應予診  
其脉數膿成此癰患也遂針之出膿數碗許大便即  
利五日陰囊腫脹小便不行仍針之尿膿大泄氣息  
奄奄脉細汗不止潰處愈張復用大劑參耆歸朮之  
藥猶緩俾服獨參湯至二斤氣稍復又服獨參膏至

外科心法卷一  
十餘斤兼以托裏藥兩月餘而平大抵瘡瘍膿血大泄先補血氣爲主雖有他病當從末治

一男子年四十餘患腰痛服流氣飲寄生湯不應以熱手熨之少可蓋脉沉弦腎虛所致以補腎丸愈之

### 潰後發寒熱

一男子患腿癰膿已成予針之出二碗許飲以托裏藥一劑大發熱更以聖愈湯二劑而止翌日惡寒不食脉細如絲以人參一兩熟附子三片姜棗煎再服而愈但少食不寐更與內補黃耆湯而平

一婦人患乳癰愈後發熱服養氣血藥不應與八珍

湯加炮乾薑四劑而止仍以前湯加黃耆香附三十餘劑氣血平復

一婦人瘰癧愈後遍身作痒以十全大補湯倍加香附治之而愈

一男子腿腫發熱畏寒以補中益氣湯治之彼以爲緩乃服苓連等藥熱愈盛復請治予以人參養榮湯二十餘劑而潰更以參耆歸朮炙甘草肉桂又月餘而斂夫火之爲病當分虛實苓連苦寒能瀉心肺有餘之火若老弱或飲食勞倦而發者此爲不足當以甘溫之劑治之未嘗有實熱而畏寒虛熱而喜寒者

此其驗也

一婦人患瘰癧延至胸腋膿水淋漓日久五心煩熱肢體疼痛頭目昏重心忪頰赤口乾咽燥發熱盜汗食少嗜卧月水不調臍腹作疼予謂非瘡故乃血虛而然也服逍遙散月餘少可更服八珍湯加牡丹皮香附子又月餘而經通再加黃耆白朮兩月餘而愈一室女臂患腫潰久不斂寒熱交作五心煩熱飲食少思月水不通亦與前藥經行瘡愈一婦人月水不行潮熱咳嗽肌體日瘦胸膈不利頸腫一塊日久不消亦服前藥熱退腫消經行而愈

一婦人因怒傷不思飲食發熱倦怠骨肉痠痛羸瘦面黃經水積漸不通頸間結核以逍遙散八珍湯治之少可彼自誤服水蛭等藥血氣愈虛遂致不起良甫云憂愁思慮則傷心心傷則血逆竭血逆竭則神色先散而月水閉火既受病不能榮養其子故不嗜食子虛則金氣虧故發咳嗽既作水氣絕故四肢乾木氣不克又云經候微少漸漸不通手足骨肉煩痛日漸羸瘦潮熱其脉微數此由氣虛血弱陽往乘之少水不能滅盛火故火逼水涸亡津液當養血益陰用栝子丸澤蘭湯爲主勿遽通之

潰瘍作痛

丁蘭年二十餘股內患毒日久欲求內消診其脉滑數知膿已成因氣血虛不潰遂刺之膿出作痛以八珍湯治之少可但膿水清稀更以十全大補湯加炮附子五分服數劑漸愈仍服十全大補湯三十餘劑而痊丹溪云膿出而反痛者虛也河間亦云

有僧股內患腫一塊不痛不潰治以托裏二十餘劑膿成刺之作痛予謂腫而不潰潰而反痛此氣血虛甚也宜峻補之彼云氣無補法予謂正氣不足不可不補補之則氣化而痛邪自除遂以參耆歸朮熟地

黃治之兩月餘而平夫凡瘡瘍之作先發爲腫氣血鬱積蒸肉爲膿故多痛膿潰之後腫退肌寬痛必漸減而痛愈盛者此氣血不足也亦丹溪河間虛甚之說

潰瘍不痛

陳監生年踰三十左腿微腫痛雖日久肉色如故不思飲食東垣云瘡瘍之證腫下而堅者發於筋骨此附骨疽乃真虛濕氣襲於肉裏而然蓋諸氣皆稟於胃食少則胃弱法當助胃壯氣遂以六君子湯加藿香當歸數劑飲食漸進更以十全大補湯而愈

山西宋琰年踰三十臂患癰潰而不痛膿稀脉弱丹溪云疽潰深而不痛者胃氣大虛而不知痛也東垣云膿水清稀瘡口不合氣血俱虛也當以大補藥治彼不聽服消毒藥氣血虛甚遂不救丹溪云纔見腫痛叅之脉症虛弱便與滋補氣血無虧可保終吉又云潰瘍內外皆虛宜以補接爲主

熱毒作嘔

劉貴腹患癰焮痛煩燥作嘔脉實河間云瘡瘍者火之屬須分內外以治其本若脉沉實者先當踈其內以絕其源又云嘔噦心煩脉沉而實腫硬木悶或皮

肉不變邪氣在內宜用內踈黃連湯治之然作嘔脉實毒在內也遂以前湯通利二三行諸證悉去更以連翹消毒散而愈

金臺王時亨年踰四十臂患毒焮痛作嘔服托裏消毒藥愈盛予以涼膈散二劑頓退更以四物湯加芩連四劑而消

胃寒作嘔

張生患漆瘡作嘔由中氣弱漆毒侵之予以六君子湯加砂仁藿香酒炒芍藥治之彼不信另服連翹消毒散嘔果盛復邀治仍以前藥外以麻油調鐵繡末

塗之而愈

王文遠臂患毒作痛服寒涼藥遂致食少大便不實  
予以理中丸二服更以六君子湯加砂仁藿香治之  
再以托裏藥膿潰而愈大凡瘡痛甚者如稟厚有火  
則宜苦寒之劑若稟薄者則宜補中益氣湯加芩連  
之類在下加黃栢人肥而瘡作痛者宜用荆防羌獨  
之類蓋取其風能勝濕也

顧浩室年踰四十患發背治以托裏藥而潰忽嘔而  
瘡痛胃脘弦緊彼以爲餘毒外攻東垣云嘔吐無時  
手足厥冷臟腑之虛也丹溪云潰後發嘔不食者濕

氣侵於內也又云膿出而反痛此爲虛也今胃脘弦  
緊木乘土位其虛明矣予欲以六君子湯用酒炒芍  
藥砂仁藿香治之彼自服護心散嘔愈盛復邀治仍  
用前藥更以補氣血藥兩月而愈大抵濕氣內侵或  
感穢氣而作嘔者必喜溫而脘弱熱毒內攻而作嘔  
者必喜涼而脘數必須辨認明白亦有大便不實或  
腹作痛或膨脹或嘔吐或吞酸噯腐此腸胃虛寒也  
以理中湯治之如不應加熟附子二三片有侵晨作  
瀉者名曰腎瀉以二神丸治之有食少漸瘦者爲脾  
腎虛也尤宜服二神丸是又治夢遺生肌肉之要藥

也予嘗飲食少思吞酸噯腐諸藥不應唯服理中湯  
及附子理中丸有效蓋此證皆因中氣虛寒不能運  
化鬱滯所致故用溫補之劑中氣溫和自無此證矣  
河南張承祖年踰二十腋下患毒十餘日腫硬不潰  
脉弱時嘔予謂腫硬不潰脉弱乃陽氣虛嘔吐少食  
乃胃氣弱先以六君子湯加藿香砂仁治之彼曰腫  
瘍時嘔當作毒氣攻心治之潰瘍時嘔當作陰虛補  
之予曰此丹溪太槩言也即諸痛痒瘡皆屬心火如  
腫赤痛甚煩燥脉實而嘔爲有餘當下之腫硬不潰  
脉弱而嘔爲不足當補之亦有痛傷胃氣或感寒邪  
穢氣而嘔者雖腫瘍尤當助胃壯氣彼執不信飲攻  
伐藥愈病復請診其脉弱微而發熱予謂熱而脉靜  
脫血脉實汗後脉燥皆難治後果歿夫腫瘍毒氣因  
侵作嘔十有一二潰瘍濕氣內侵作嘔十有八九豈  
可混爲一途

一人胃弱痰盛口舌生瘡彼服滾痰丸愈感反瀉不  
止惡食怠倦此胃氣被傷也予以香砂六君子湯數  
劑少可再以補中益氣湯加茯苓半夏二十餘劑而  
愈夫胃氣不足飲食不化亦能爲痰補中益氣乃治  
痰之法也苟虛證而用峻利之劑鮮不危哉



周上舍脾胃虛服養胃湯枳朮丸初有效而久反虛  
口舌生瘡勞則愈盛服敗毒藥則嘔吐此中氣虛寒  
也以理中湯治之少愈更以補中益氣湯加半夏茯苓  
苓月餘而平夫養胃湯香燥之劑也若飲食停滯或  
寒滯中州服則燥開胃氣宿滯消化少爲近理使久  
服則津液愈燥胃氣愈虛况胃氣本虛而用之豈不  
反甚其病哉亦有房勞過度真陽衰憊或元稟不足  
不能上蒸中州不運致食不進者以補真丸治之若  
丹田之火上蒸脾土脾土溫和中焦自治飲食自進  
經云食飲不進胸膈痞塞或食而不消大腑澹泄此  
皆真火衰不能蒸運脾土而然也若腎氣壯則丹田  
之火上蒸脾土即無此病矣

有人因勞倦耳下焮腫惡寒發熱頭疼作渴右手脉  
大而軟此不足證也當服補中益氣湯彼反用發表  
藥遂致嘔吐始悟予以六君子湯治之更服補中益  
氣湯而愈大抵內傷者榮衛失守皮膚間無氣以滋  
養則不能任風寒胃氣下陷則陰火上衝氣喘發熱  
頭痛發渴而脉大此乃不足之證也大抵飲食失節  
勞役過度則多成內傷不足之證若誤以爲外感表  
實而反瀉之豈不致虛虛之禍哉東垣云凡內傷爲

飲食勞役所傷則右手脉大於左手外感風寒則左手脉大於右手當以此辨之

一婦人年二十餘飲食後每因怒氣吞酸腐或兼腿根炊腫服越鞠丸等藥不應此脾氣虛濕氣下注而然也予以六君子湯香附砂仁藿香炮薑數劑少愈更以六君子湯數劑而愈一男子瘰癧已愈患吞酸服參朮藥不應彼謂餘毒予以附子理中丸亦愈

外科心法卷之一終

止齋外科心法卷之二

薛已新甫著

瘡瘍作渴

開化吾進士年三十面患瘡已潰作渴自服托裏及降火藥不應予診其脉浮而弱丹溪云潰瘍作渴屬氣血俱虛况脉浮弱投以參耆各三錢歸朮熟地各二錢數服渴止又以八珍湯加黃耆數劑脉斂而愈予治瘡瘍作渴不問腫潰但脉數發熱而渴以竹葉黃耆湯治之脉不數不發熱或脉數無力而渴或口乾以補中益氣湯若脉數而便秘以清涼飲尺脉洪

大按之無力而渴以加減八味丸並効若治口燥舌黃飲水不歇此丸尤効

一男子渴後背發疽未潰脉數無力此陰虛火動用加減八味丸呿咀二劑稍緩次用九劑而愈葉司訓腦患疽亦作渴脉雖洪按之無力以此藥治之不信自用滋陰等藥愈盛七惡併至而歿精要云患疽之人雖云有熱皆因虛而得之愈後發渴及先渴而後疽非加減八味丸不能治

一男子年踰五十腋下患毒瘡口不合右關脉數而渴此胃火所致用竹葉黃芪湯遂止再用補氣藥而愈嘗治午後發渴或發熱用地骨皮散亦効

一男子患痔漏口乾胃脉弱此中氣不足津液短少不能上潤而然以黃芪六一湯七味白朮散治之或曰諸痛痒瘡皆屬心火遂服苦寒之藥大便不禁而歿夫諸痛痒瘡皆屬心火言其常也始熱終寒則反常矣可泥此而不察乎

李氏論人病疽多有愈後發渴而不救者治之惟加減八味丸最妙疽安而渴者服此丸則渴止疽安而未渴者預服此丸則永不生渴氣血加壯或未發疽而先發渴者服此不惟渴止疽亦不作又云一貴人

病疽未安而作渴一日飲水數升予以加減八味丸治之諸醫大笑云此能止渴我輩當不復業醫皆用木瓜紫蘇烏梅人參茯苓百藥煎等劑服多而渴愈甚不得已用此藥三日渴止久服遂不復渴飲食加倍健於少壯蓋此藥非出鄙見自爲兒時聞先君言有人病渴用渴藥累年不愈一名醫使服此藥不半年而愈其疾本以腎水枯竭不能制火心火上炎是以生渴此藥降火爲最降心火生腎水親用之嘗驗患者當知所鑒

詳見外科精要

### 瘡瘍便秘

傅允承母年踰七十腰生一癰作痒異常疑虫蟲所毒診脉浮數齊氏云浮數之脉而反惡寒瘡疽之謂也又云外如麻裏如瓜疽毒在內翌日復診脉乃弱予謂未潰而脉先弱何以收斂况大便不通則真氣已竭治之無功其子固請不得已用六君子湯加藿香神曲飲食漸進大便始通更用峻補之劑潰而膿清作渴再用參芪當歸熟地黃麥門冬五味子而渴止允承喜曰吾母可無虞矣予謂不然不能收斂先入之言也彼疑遂速他醫果不起

浙江俞上舍年五十患癰將痊大便閉澀服芩連等

藥反廢飲食予用益氣血之劑加桃仁蘇仁亦未効  
更以猪胆汁一碗納谷道始効更以養血氣藥而平  
屈病式云諸澁枯涸皆屬於燥燥者火之氣病後血  
衰故大便閉澁宜以辛甘之藥潤之如用寒苦之藥  
則胃氣伐矣若老弱或產後而便難者皆氣血虛也  
胆汁最効尋常上部枯燥者以酒調服亦佳

### 膿熟開遲

蘇州施二守弟項下患毒膿已成因畏針焮延至胸  
赤如霞其脉滑數飲食不進月餘不寐甚倦予密針  
之膿出即睡覺而思食用托裏藥兩月餘而愈又一

人患此及時針刺數日而愈劉壘素虛患此不針潰  
透頷頰氣血愈虛竟不救

廣東王上舍患附骨癰畏針不開臀膝通潰脉數發  
渴煩燥時嗽飲食少思齊氏曰瘡瘍煩燥時嗽腹痛  
渴甚或瀉利無度或小便如淋此惡證也膿出之後  
若脉洪數難治微瀼遲緩易治遂刺之膿出四五碗  
許即服大劑參耆歸朮翌日脉稍斂更以八珍湯加  
五味麥門肉桂白斂三十餘劑脉緩膿稠三月而愈  
王大守宜人患發背膿熟不開昏悶不食此毒入內  
也斷不治強之針膿碗許稍蘇須臾竟亡大抵血氣

壯實膿自湧出老弱之人氣血枯槁必須迎而奪之  
順而取之若毒結四肢砭刺少緩腐潰深大亦難收  
斂毒結於頰項胸腹緊要之地不問壯弱急宜針刺  
否則難治

梁閣老孫甫周歲項患胎毒予俟其有膿刺之膿出  
碗許乳食如常用托裏藥月餘而愈斬閣老子亦患  
此待膿自出幾至不救吾鄉徐內翰子患痘毒及時  
針刺毒不內侵數日而愈大抵古人制法淺宜砭而  
深宜刺使瘀血去於毒聚之始則易消况小兒氣血  
又弱膿成而不針砭鮮不斃矣

一老人腿患附骨疽腫硬大按方痛口乾脉弱腫聚  
不潰飲食少思予謂腫下而堅者發於筋骨皮色不  
變者發於骨髓遂以參耆等藥托之三十餘劑膿雖  
孰不穿予謂藥力難達必須針刺不聽至旬日方刺  
之湧出清膿五六碗許然衰老之人氣血不足養毒  
又久竟不治大抵瘡疽旬日不退宜托之有膿刺之  
有腐肉取之虛則補之此十全之功也

滕千兵年踰五十臀患癰膿熟不開攻通大肛膿從  
大便而出予辭不能治果斃丹溪云臀居小腹之後  
陰中之陰也道遠位僻血亦罕周中年後尤慮患此

况膿成不刺欲不亡得乎

### 腐肉去遲

鄭揮使年踰五十患發背形證俱虛用托裏藥而潰但有腐肉當去彼惧不肯延至旬日則好肉皆敗矣雖投大劑毒甚竟不救古人謂壞肉惡於狼虎毒於蜂螫緩去之則戕賊性命信哉

### 陰證似陽

舉人潘光甫年踰四十患腦疽腫焮診其脉沉靜予謂此陽證陰脉斷不起已而果然蓋瘡疽之證雖屬心火尤當分表裏虛實果元氣克實內有實火者寒劑或可責効若寒涼過度使胃寒脾弱陽證變陰或結而不潰或潰而不斂陰陽乖戾水火交爭死無日矣

### 陽瘡似陰

太監劉關患發背予奉 旨往治腫痛色紫診其脉息沉數陳良甫云脉數發熱而痛者發於陽也且瘡瘍赤甚則紫即火極似水也詢之嘗服透骨丹半載乃積溫成熱所致遂以內疎黃連湯再服稍平更用排膿消毒藥及猪蹄湯太乙膏而愈經曰色與脉當相參應治之者在明亢害承制之理陰陽變化之機

焉耳

用藥生肌

姑蘇黃汝耘年踰五十患發背用生肌藥太早背竟腐潰更泄瀉脉微緩予以二神丸先止其瀉次以大補藥治之用猪蹄湯洗淨以黃耆末填滿患處乃用膏藥蓋其初起時曾用蒜多灸故毒不內攻兩月而愈

許序班患發背十餘日瘡頭如粟許腫硬木悶肉色不變寒熱拘急脉沉實此毒在內也先以黃連內踈湯次用消毒托裏藥其毒始發奈欲速急用生肌劑患處忽若負重身如火熾後竟不起東垣云毒氣未盡不可用生肌藥縱得平復必再發若毒氣入腹十死八九大抵毒氣盡脾氣壯則肌肉自生生肌藥可弗用矣

毒入內

張宜人年踰六十患發背二口肉色不變頭如粟許肩背加重寒熱飲冷脉洪數陳良甫云外如麻裏如瓜齊氏云增寒壯熱所患必深又云肉色不變發于內也予以人參敗毒散二劑及隔蒜灸五十餘壯毒始發背始輕再用托裏藥漸潰顧氣血虛甚而作渴



參耆當歸熟地等藥渴亦止彼欲速自用草藥菴患處毒氣復入遂不救嘗見老弱者患此瘡頭不起或堅如牛領之皮多不待潰而死有潰後氣血不能培養者亦死凡瘡初潰毒正發越宜用膏藥吸之參耆等藥托之若反以藥遏之使毒氣內攻者必不救智化寺一僧患瘡疥自用雄黃艾葉等藥燃于被中薰之翌日遍身焮腫皮破水出飲食不入予投以解藥不應而死蓋藥毒薰入腹內而散真氣其禍如此

喉閉

附諸骨鯁并稻麥芒在喉及誤吞金銀銅錢

莆田史侍御患喉閉以防風通聖散治之腫不能嚥

予謂此症須針乃可奈牙關已閉遂刺少商穴出血口卽開更以膽礬吹患處吐痰二碗許仍投前藥而愈嘗見患此疾者畏針不刺多斃少商穴在手大指內側去爪甲如韭葉許于縣尹喉閉腫痛寒熱脉洪數此少陰心火少陽相火二經為病其證最惡惟刺患處出血為上因彼畏針先以涼膈散服之藥從鼻出急乃願刺則牙關已緊不可針遂刺少商二穴以手勒去黑血口卽開仍刺喉間治以前藥及金鑰匙吹之頓退又以人參敗毒散加芩連玄參牛蒡子四劑而平經曰火鬱發之謂發汗出血乃發汗之一端也河間云治喉閉之火

與救火同不容少怠常見喉閉不去血喉風不去痰  
以至不救者多矣每治咽喉腫痛或生瘡毒以荆防  
敗毒散加苓連重者用防風通聖散並效  
杜舉人咽喉腫痛口舌生瘡先以清咽消毒散二服  
更以玄參升麻湯而愈

一男子年三十餘口舌常破如無皮狀或咽喉作痛  
服清咽利膈散愈盛予以理中湯治之而愈

聘士王文遠咽喉腫痛口舌生瘡勞而愈盛以補中  
益氣湯加玄參酒炒知母黃柏治之而愈

一男子咽喉作痛午後尤甚以四物湯加酒炒黃柏

知母桔梗治之而愈

治諸骨鯁象牙末吹患處或取犬涎徐徐嚥下立效

治穀麥芒在咽不出取鷄鵝涎含之立消

諸骨鯁用芎根搗爛丸如彈子大就將所鯁物煎湯  
化下又方食橄欖或用核爲末含之亦效

治誤吞金銀等物多食諸般肥肉膏滑自從大便出  
治誤吞銅錢用炭末白湯調服或多食蜜或飴糖自

從大便出或多食葶藶或胡桃肉錢自消

治誤吞針用磁石如棗核大磨令光鑽一孔用線穿  
令含之針自口出

口齒咽喉并腎虛耳痛

太宗伯毛公齒痛胃脉無力用補中益氣湯加生地黃牡丹皮治之而愈

党吏部頰顙腫焮至牙齦右關脉數此胃經風熱上攻也以犀角升麻湯治之而消

郭職方齒腫痛焮至頰顙素善飲治以清胃散數劑而愈

一男子患齒痛服清胃散不應服涼膈散愈盛予用補腎丸治之而愈

一男子耳內出膿或痛或痒服聰耳益氣湯不應服

防風通聖散愈盛予以補腎丸治之而愈

瘰癧

沈氏室患瘰癧久而不消自汗惡寒此氣血俱虛也遂以十全大補湯月餘而潰然堅核雖取而瘡口不斂更灸以豆豉餅仍與前藥加烏藥香附兩月而愈大抵堅而不潰潰而不合皆由氣不足也嘗見患此瘡者瘡口雖合而不加補往往變為瘰癧症若發寒熱眼內有赤脉貫瞳子俱不治一脉者一年死二脉者二年死

一婦人因怒耳下腫痛以荆防敗毒散加連翹黃芩

四貼而愈嘗治此旬日不消者以益氣血藥及飲遠志酒其腫自消若無膿者亦自潰不戒忿怒者難治一婦人亦因怒耳下焮腫頭痛寒熱與荆防敗毒散加黃芩治之表證悉退但飲食少思日晡發熱東垣云雖有虛熱不可太攻熱去則寒生也遂以小柴胡湯加地骨皮川芎當歸茯苓白朮陳皮十餘貼而愈次年春復腫堅不潰來索方予定八珍湯加香附柴胡地骨皮桔梗自製服之至六七劑以為延緩仍服人參敗毒散勢愈盛又服流氣飲則盜汗發熱口乾少食至秋復求治診視氣血虛極予辭不治果歿今

人有瘡瘍不審元氣虛實病在表裏便服敗毒流氣藥殊不知敗毒散乃發表之藥果有表證亦止宜一二服多則元氣反損其毒愈盛雖有人參莫補流氣飲乃耗血之劑果氣結膈滿亦止宜二三服多則血氣愈傷反為敗症雖有芎歸難以倚伏丹溪云此不係膏梁丹毒之變因虛勞氣鬱所致也

一婦人患癰癧不消膿清不斂予以八珍湯治之少愈忽肩背痛不能回顧此膀胱經氣鬱所致當以防風通氣湯治之蓋膀胱之脉始於目內背上頂顛下耳角復上頂至腦後過風府下項走肩膊一支下腰

督是經氣動則脊痛項強腰似折按此非膀胱經證而何彼乃云瘰癧膽經病也其脉主行項側即是經火動而然遂自服清肝降火之藥反致不食痛盛復請予診其脉胃氣愈弱先以四君子湯加陳皮炒芍藥半夏羌活蔓荊子四劑食進痛止繼以防風通氣湯二劑而愈又一婦流注潰久忽發熱乃虛也與補藥二劑不用另用人參敗毒散大熱而斃夫老弱之人雖有風邪亦宜以補中益氣湯治之况又非表證而峻表不死何俟

田氏婦年踰三十患瘰癧已潰不愈與八珍湯加柴

胡地骨夏枯草香附貝母五十餘劑形氣漸轉更與必効散二服瘡口遂合惟氣血未平再用前藥三十餘劑而平後田生執此散不問虛實槩以治人殊不知散中班猫性毒雖專治瘰癧多服則損元氣若氣血實者先用此下之而投補劑或可愈若虛而用下藥或追蝕藥來肉雖去而瘡口不合反致難治一男子因怒耳下及缺盆患瘰癧潰延腋下形氣頗實瘡口不合以散腫潰堅丸治之而愈又一婦患此氣血不弱亦服此丸其核並消而瘡口不斂更以十全大補湯及灸以豆豉餅始痊

廣東陳方伯子遠途勞倦發熱脉大無力耳下患腫此勞損症也飲補中益氣湯自然熱退腫消若專攻毒則有虛虛之禍彼不听服降火藥及必効散果吐瀉不食而死夫人勞倦則損氣氣衰則火旺火旺則乘其脾土故倦怠而熱此元氣傷也丹溪云宜補形氣調經脉其糖粕可汗下若不詳脉證經絡受病之異而輒下之鮮不危矣

汪中翰姪年及二十耳下患癰焮痛左關脉數此肝經風熱所致以荆防敗毒散三貼表症悉退再與散腫潰堅九月餘而平復

一婦年二十耳下結核經水每過期午後頭痛服頭風藥愈盛予以八珍湯加柴胡地骨皮二十餘劑而愈

楊文魁年踰三十每勞心過度頸腫發熱服敗毒散愈盛予以補中益氣湯數劑而消

流注

陳進士遂初年踰三十小腹腫硬踰年而瘡頭破時出血水此七情所傷營氣逆於肉理而然名曰流注診之肝脉濇蓋肝病脉不宜濇小腹正屬肝經須濇脉退乃可愈予欲以甘温之劑補其氣血令自消潰

彼不信仍服攻伐之藥致氣血愈虛果幾千金旺之  
月丹溪云諸經惟少陽厥陰之生癰疽宜預防之以  
其多氣少血也少血而肌肉難長瘡久不合必成癰  
不知此輒用峻利毒藥以伐其陰分之血則其禍不  
旋踵矣

一室女背胛結一核如錢大而不炊但倦怠少食日  
晡發熱脉軟而濇此虛勞氣鬱所致也予用益氣養  
血開鬱之藥復令飲人乳精神稍健彼不深信又服  
流氣飲食遂少四肢痿軟其父悔之復請予治予  
以為決不可起矣後果斃

一男子年三十餘歲素飢寒患右肋腫如覆瓢轉側  
作水聲脉數經曰陰虛陽氣湊襲寒化為熱熱甚則  
肉腐為膿即此證也及按其腫處即起是膿已成矣  
遂以濃煎黃耆六一湯令先飲二鍾然後針之膿出  
數碗許虛症並至遂以大補藥治之三月餘而愈大  
抵膿血大泄氣血必虛當峻補之雖有他病皆宜緩  
治蓋元氣一復諸病自退若老弱之人不問腫潰尤  
當補也

一婦人左臂胃經部分結腫一塊年許不潰堅硬不  
痛肉色不變脉弱少食月經每過期日晡發熱遇勞

或怒則痛此不足之症也遂與參耆歸木川芎芍藥  
熟地黃貝母遠志香附桔梗牡丹皮甘草百餘貼而  
消大抵婦病多起於鬱鬱則氣血受傷百病生矣  
一子年十九腰間腫一塊無頭不痛色不變三月不  
潰飲食少思肌肉日瘦此寒搏腠理榮氣不行鬱而  
為腫也名曰濕毒流注元戎云若人飲食踈精神衰  
氣血弱肌肉消薄榮衛之氣短促而滯滯故寒搏腠  
理閉鬱而為癰腫者當補之以接虛怯之氣遂以十  
全大補湯加香附陳皮三十餘劑始針之遂出白膿  
二碗許仍用前藥倍加參耆及以豆豉餅灸之漸愈

彼惑於速効者乃內服敗毒外貼寒涼藥反致食少  
膿稀患處色紫復請予治喜得精氣未喪仍以前藥  
加遠志貝母白斂百劑而愈此瘡若久而不愈或膿  
水清稀者當以內塞散服之及附子餅灸之然後可  
愈若不慎飲食起居七情者不治

劉文通室年踰二十腰間突腫寸許肉色不變微痛  
不潰發熱脉大此七情所傷氣血疑滯遊於隧道而  
然也當益氣血開鬱結更以香附餅熨之使氣血充  
陽內自消散不消雖潰亦無虞不听乃服十宣流氣  
之藥氣血愈虛破出清膿不斂而斃



乳癰

王汝道室年踰三十每怒後乳內作痛或腫此肝火所致與小柴胡合四物湯加青皮桔梗香附枳殼而愈彼欲絕去病根自服流氣飲遂致朝寒暮熱益加腫痛此氣血被損而然予與八珍湯三十餘劑喜其年壯元氣易復而得愈也

郭氏妾乃放出宮人年四十左乳內結一核堅硬按之微痛脉弱懶言此鬱結症也名曰乳岩須服解鬱結益血氣藥百貼可保郭謂不然別服十宣散流氣飲瘡反盛逾二年復請予視其形如覆碗腫硬如石膿

出如泔予謂膿清脉大寒熱發渴治之無功果歿一婦年踰二十稟弱乳內作痛頭疼脉浮與人參敗毒散倍加人參一劑表證悉退但飲食少思日晡微熱更以小柴胡湯合六君子湯二劑熱退食進方以托裏藥加柴胡十餘劑針出膿而愈又有一婦患此症膿成畏針病勢漸盛乃強針之膿出三碗許脉數發渴以大補藥三十餘劑而愈丹溪云乳頭爲陽明所經乳房爲厥陰所屬厥陰者肝也乃女子致命之地宗筋之所且各有囊橐其始炊腫雖盛受患止於一二囊若膿成不刺攻潰諸囊矣壯者猶可弱者多

致不救所以必針而後愈也

一婦人乳內腫一塊如鷄子大勞則作痛久而不消服托裏藥不應此乳勞症也屬肝經血少所致先與神効瓜萋散四劑更隔蒜灸之腫少退再服八珍湯倍加香附夏枯草蒲公英仍間服前散月餘而消亦有乳疽一症其狀腫硬木悶雖破而不潰腫亦不消尤當急服此散及隔蒜灸斯二症乃七情所傷氣血所損亦勞症也宜戒怒節飲食慎起居否則不治

一婦人患乳癰氣血頗實但瘡口不合百法不應予與神効瓜萋散四劑少可更與數劑及豆豉餅灸之

而愈又一婦患此未潰亦與此藥三劑而消良甫云如有乳勞便服此藥可杜絕病根如毒已成能化膿為水毒未成者則從大小便中散之

一婦人患癰癰與養血順氣藥不應亦與神効瓜萋散二劑頓退又六劑而消却與托裏藥氣血平復而愈

一婦人患乳癰寒熱頭痛與荆防敗毒散一劑更與蒲公英春秋間開黃花似菊一握搗爛入酒二三盞再搗取酒

熱服粗熱菴患處而消丹溪云此草散熱毒消腫核

又散滯氣解金石毒之聖藥鄉人採克菜俗呼葶葶丁

一婦人產次子而無乳服下乳藥但作脹予謂人乳

皆氣血所化今脹而無乳是血氣竭而津液亡也當  
補其氣血自然有乳矣乃與八珍湯倍加參朮少加  
肉桂二十餘服乳遂生後因勞役復竭夫其初產有  
乳再產而無其氣血祇給一產耳其衰可知間有產  
後乳出不止亦為氣虛宜補藥止之其或斷乳兒不  
吮亦能作脹則用麥蘖炒為末白湯調服以散之若  
兒吮破乳頭成瘡則用蒲公英末或黃連胡粉散摻  
之若乳頭裂破以丁香末或蛤粉臙脂傳之並効  
內翰李蒲汀太夫人左脇內作痛牽引胸前此肝氣  
不和尚未成瘡用小柴胡湯加青皮枳殼四劑少可

再加芎歸治之而愈

### 漏瘡

一男子腎患漏口乾發熱喜膿不清稀脉來遲緩以  
豆豉餅灸及服八珍湯加麥門冬五味子軟柴胡地  
骨皮三月餘而愈後因不順房勞復潰膿清脉大請  
辭不治果歿河間云因病致虛則為輕蓋病勢尚淺  
元氣未虛也至病初愈而勞復或復飲食勞倦或房  
勞七情六慾陽痿陰弱加致羸損此因虛致損則為  
重病勢已過元氣已索故也

一男年踰二十稟弱左腿外側患毒三月方潰膿水

清稀肌肉不生以十全大補湯加牛膝二十餘劑漸愈更以豆豉餅灸之月餘而痊又一媪左臂結核年餘方潰膿清不斂一男子患貼骨癰腿細短軟瘡口不合俱飲十全大補湯外用附子餅及貼補藥膏調護得宜百貼而愈大凡不足之症宜大補之劑兼灸以補接陽氣祛散寒邪為上

京師董賜年踰四十胸患瘡成漏日出膿碗許喜飲食如常以十全大補湯加貝母遠志白斂續斷灸以附子餅膿漸少謹調護歲餘而愈

### 附骨疽

李戶部孟卿環跳穴患附骨疽彼謂小瘡遂服敗毒之劑更用寒涼藥敷貼因痛極刺之膿瘀大泄方知為癰也請予治診其脉右關浮大此胃氣已傷故瘡口開張肉紫下陷捫之不熱彼云瘡內更覺微冷自意必成漏矣遂以豆豉餅灸之飲以六君子湯加藿香砂仁炮姜數劑胃氣漸醒飲食漸進患處漸緩肌肉漸生再以十全大補湯而愈又畢上舍患此內痛如錐外色不變勢不可消喜其未用寒劑祇因痛傷胃氣而不思食亦以前藥去炮姜治之飲食少進更以十全大補湯二十餘劑而膿成遂針去仍以大補

湯倍加參耆芎歸膿久不止更加麥門五味貝母遠志數服漸止瘡亦愈按二證蓋因濕熱滯於肉理真氣不能運化其始宜除濕熱實脾土和血氣則濕自消散若膿未成即以隔蒜灸之立効

王時享室產後腰間腫痛兩腿尤甚此由瘀血滯於經絡而然也不早治必作骨疽遂與桃仁湯二劑稍愈更以沒藥丸數服而痊亦有惡血未盡臍腹刺痛或流注於四肢或注股內疼痛如錐或兩股腫痛此由冷熱不調或思慮動作所擁遏血蓄經絡而然宜沒藥丸治之亦有經血不行流注四肢或股內痛如錐或因水濕所觸經水不行而腫痛者宜當歸丸治之凡惡血停滯為患匪輕治之稍緩則為流注為骨疽多致不救

### 腸癰

金臺院僉憲年踰五十腹內隱痛小便如淋皮膚錯縱而脉滑數此腸癰也脉滑數則膿已成遂以廣東牛皮膠酒溶化送太乙膏下膿升許更以排膿托裏藥及蠟礬丸而愈

汪中翰側室產後小腹作痛諸藥不應其脉滑數此瘀血內漬為膿也以瓜子仁湯痛止更以太乙膏而

愈今人產後多有此病縱非癰患用之更効有人臍  
出膿水久而不愈亦以前膏及蠟礬丸治之亦愈

外科心法卷之二終